

Uunga siunnersuut:

Aningaasarsianit akileraarutit pillugit Inatsisartut inatsisaata allangortinneqarneranik

Inatsisartut inatsisaat

(Akeqanngitsumik biileqarnerup, akiliunneqarluni angalanerit, akeqanngitsumik oqarasuaateqarnerit, akeqanngitsumik internetseqarneq, akeqanngitsumik nerisaqarnerup, akeqanngitsumik ineqartinneqarnerup akileraarutitigut nalinga, akileraarutini ilanngaatinik il.il. inatsimmi aalajangersaaneq, suliffeqarfiit nunani allani illersornissamut oqartussat sullillugit suliassanik suliarinnittartut Kalaallit Nunaanni akileraarutitigut angerlarsimaffeqarnissamik pisussaaffeqarnerat, transfer pricingimi uppersaasiinissamut piunnaasaatinik naammassinninnginnermi pineqaatissiissutit aamma ingerlatseqatigiiffiit akileraarummik akiliigallartarnerat il.il.)

§ 1

Aningaasarsianit akileraarutit pillugit Inatsisartut inatsisaanni nr. 12, 2. november 2006-imeersumi, ilaatigut Inatsisartut inatsisaanni nr. 11, 15. november 2007-imeersumi, Inatsisartut inatsisaanni nr. 3, 30. november 2009-meersumi, Inatsisartut inatsisaanni nr. 8, 3. december 2012-imeersumi, Inatsisartut inatsisaanni nr. 18, 26. juni 2017-imeersumi, Inatsisartut inatsisaanni nr. 23, 13. November 2017-imeersumi, Inatsisartut inatsisaanni nr. 22, 28. november 2018-imeersumi, Inatsisartut inatsisaanni nr. 41, 2. december 2019-imeersumi, aammalu kingullermik Inatsisartut inatsisaanni nr. 12, 19. november 2020-meersumi allangortinneqartumi, makkua allangortinneqarput:

1. § 2, imm. 6, imatut oqaasertalerneqarpoq:

” *Imm. 6.* Imm. 1 malillugu akileraartussaataaannermi taamaallaat isertitat aamma isertitanut tunngavigineqartussat taaneqartut kisimik pineqartunut ilaatinneqarput, taamatullu aningaasartuutit isertitanut imaluunniit isertitanut tunngavigineqartussanut taakkununga tunngassuteqarpata, aatsaat taakkua ilanngaatigineqarsinnaallutik. Inunnut imm. 1, nr. 1 malillugu akileraartussaataasunut, aningaasarsiarititat 10 procentiinik, taamaattoq ukiumut annertuumik 1.000 koruuninik, ilanngaasiisoqassaaq.”

2. § 3-p kingorna ilanngunneqarpoq:

” **§ 3 a.** Suliffeqarfiit nunani allani illersornissamut oqartussat isumaqatigiissuteqarfigalugit sumiiffinni kommunit aggornerisa avataanni suliassanik suliarinnittut, aktiaatileqatigiiffittut imaluunniit piginneqatigiiffittut Kalaallit Nunaanni angerlarsimaffeqartutut nalunaarsorsimasuussapput aammalu taakkua aqutsisui Kalaallit Nunaanniissallutik.

Imm. 2. Imm. 1 taamatuttaaq suliffeqarfinnut imm. 1 naapertorlugu kommunit aggornerisa avataanni suliassanik suliarinninnissaq pillugu nunani allani illersornissamut oqartussanut isumaqatigiissuteqarsimasunut entreprenøritut, pilersuisutut il.il. suliassanik suliarinnittunut, aammalu taakkua ataanni entreprenørinut, pilersuisunut il.il. entreprenøri, pilersuisoq il.il. sullillugu suliassanik suliaqartunut, taamaaqataanik atuutissaaq, taamaattoq imm 3 takuuk.

Imm. 3. Suliffeqarfiit imm. 1-imi aamma 2-mi pineqartunut ilaasut, tamatumunnga pissutsit immikkorluinnaq ittut tunngavilersuutigineqartillugit, imm. 2-mi pineqartunut ilaasunit allaanerusunik entreprenørinik, pilersuisunik il.il. atuisinnaapput.”

3. § 18, imm. 3, imatut oqaasertalerneqarpoq:

”*Imm. 3.* Ukiup isertitaqarfiusup tullianut erniat ikinnerpaaffissaannut annertussusiliussaq Akileraartarnermut ingerlatsiviup ulloq 20. december tikitsinnagu aalajangersassavaa.”

4. § 19, imm. 2-mi, ”60.000” allanngortinneqassaaq imaalerlugu: ”70.000 (2022-mi inissisimaneq)”.

5. § 19, imm. 3-mi, ”30.000” allanngortinneqassaaq imaalerlugu: ”35.000 (2022-mi inissisimaneq)”.

6. § 19, imm. 4-mi, ”15.000” allanngortinneqassaaq imaalerlugu: ”17.500 (2022-mi inissisimaneq)”.

7. § 19 a, imatut oqaasertalerneqarpoq:

” **§ 19 a.** Ajunngitsorsiassat imm. 2-8-imi taaneqartut, § 75, imm. 1-imi taaneqartutut A-nik isertitaqartunut atugassiissutigineqartut, nalingi imm. 2-8-mi allassimasutut aalajangersarneqassapput, taamaattoq takuuk imm. 9. Taamaaqataa ajunngitsorsiassanut inunnut siulersuisunut, ataatsimiititalianut, isumalioqatigiissitanut, siunnersuisooqatigiinnut, aalajangiisartunut imaluunniit allanut ataatsimoorlutik oqartussanut, ilanngullugit Naalakkersuisut, Inatsisartut aamma kommunalbestyrelsit, ilaasortatut imaluunniit ikiortaasussatut toqqagaasunut atugassiissutigineqartunut, kiisalu pissutsit allatigut immikkoortumi tassani ilaatinneqanngippata, § 86, imm. 3-mi taaneqartutut amerlanerussuteqartunik aktiaatilinnut, ajunngitsorsiassanik ingerlatseqatigiiffimmit pineqartup amerlanerussuteqartunik aktiaateqarfigisaanik atugassiissutigineqartunut, atuuppoq.

Imm. 2. Akeqanngitsumik ineqartitaanerup nalinga nr. 1-3-imi aalajangersakkat malillugit ingerlatsineranut akiliummut aningaasaliissutinit iluanaarutit ilanngullugit katinnerisut naatsorsorneqassaaq, taamaattoq takuuk imm. 9:

1) Ingerlatsineranut akiliut ilaqutariinnut ataatsinut illunut aammalu illunut affarleriinnut m²-imut 461 koruuniuvoq (2022-mi inissisimaneq) aammalu inissiarsuarnut aamma illunut uiguleriinnut il.il. m²-imut 512 koruuniulluni (2022-mi inissisimaneq).

2) Aningaasaliissutinit iluanaarut inissiap pissarsiarinerani akiata kingusinnerusukkat allanngortiterineranut imaluunniit pitsanngorsaaneranut aningaasartuutit ilanngullugit 1,5 procentianik annertussuseqarpoq. Taamaattoq inissiap pissarsiarinerani akia m²-imut 7.000 koruuninit (2022-mi inissisimaneq) aammalu 2022-mi m²-imut 21.000 koruuninik, 2023-mi m²-imut 28.000 koruuninik aamma 2024-mi m²-imut 35.000 koruuninik appasinnerusinnaanngilaq. Ukioq isertitaqarfiusoq 2025 aallarnerfigalugu pissarsiarinerani

akia qaffasinnerpaaq m²-imut 35.000 koruuniusoq (2024-mi inissisimaneq) akigititanik naleqqussaanermut procentiliussamik iluarsineqassaaq, takuuk § 19 c.

3) M²-imut pissarsiarinerani akia appasinnerpaaq 7.000 koruuniusoq, atortulersuutitut ikkussukkanut il.il. inissiami amigaataasunut makkununga tamaginnut immikkut m²-imut 1.000 koruunimik annikillisinneqartassaaq (2022-imi inissisimaneq):

- a) Uffarfik imaluunniit anartarfik imermik kuutsittagaq.
- b) Kiassaateqarfimmiit kiassarneq, kiassaateqarfimmiit uuliatortoq imaluunniit innaallagissamik kiassarneq.
- c) Innaallagiasaq.
- d) Imeq imaluunniit imermut tanki.
- e) Gassi imaluunniit innaallagiasaq uunnaanermut atorineqartussaaq.
- f) Naternut, qilaamut iikkanullu oqorsaaneq kiffiutissanit mineraluldinit 250 mm-init annikinneruppat. Oqorsaasersuutit allat atorineqarsimappata, oqorsaasinnaassusaa mineraluldinut naatsorsorneqassaaq.

Imm. 3. Inissiamik atuisinnaatitaanermut, takuuk imm. 2, pequtinik tamakkiisumik ilaannaasumilluunniit atuisinnaaneq ilaatinneqarpat, ukiumi isertitaqarfiusumi pequtit nalingi akeqanngitsumik ineqartitaanerup nalingata, imm. 2 malillugu inernerata paasineqartup, 5 procentianut annertussusilerneqassaaq.

Imm. 4. Pisortanit atugassiissutigineqartumik akeqanngitsumik najugaqarallartunut utaqqiisaasumik najugaqarallartunulluunniit ineqartitsinerup nalinga inissiap angissusaa malillugu qaammammut makkununga aalajangersarneqarpoq:

- 1) Inoqutigiinni ilaasut saniatigut allat igaffimmi imaluunniit perusersartarfimmi atortorissarutitut atorineqartunut atuisinnaatitaappata, inimut imaluunniit ineeqqamut ataatsimut 1.000 kr. (2022-mi inissisimaneq).
- 2) Inissiani immikkoortuni 1-imik imaluunniit 2-nik initalinni 2.000 kr. (2022-mi inissisimaneq).
- 3) Inissiani immikkoortuni 2.500 kr. (2022-mi inissisimaneq) 3-nik initalinni.
- 4) Inissiani immikkoortuni 3.500 kr. (2022-mi inissisimaneq) 4-nik initalinni.
- 5) Inissiani immikkoortuni 4.500 kr. (2022-mi inissisimaneq) 5-inik amerlanerilluunniit initalinni.

Imm. 5. Ineeqqami, inissiaaqqami igaffeeralimmi assigisaanniluunniit akeqanngitsumik ineqartitaanerup nalinga ukiumut 17.500 koruunimut aalajangersarneqarpoq. (2022-mi inissisimaneq), taamaattoq takuuk imm. 2 aamma imm. 9.

Imm. 6. Akeqanngitsumik nerisaqartitaanerup nalinga tamakkiisumik nerisaqarnermut ullormut 80 koruunimut, ilaannakortumik ullormut marloriarluni nerilluni nerisaqarnermut ullormut 59 koruunimut, aammalu ataasiarluni nerilluni nerisaqarnermut ullormut 45 koruunimut aalajangersarneqarpoq (2022-mi inissisimaneq), taamaattoq takuuk imm. 9.

Imm. 7. Akeqanngitsumik internetseqarnerup nalinga ukiumut 6.000 koruunimut aalajangersarneqarpoq.

Imm. 8. Akeqanngitsumik oqarasuaateqarnerup nalinga ukiumut 6.000 koruunimut aalajangersarneqarpoq.

Imm. 9. Ajunngitsorsiassat killilersugaanngitsumik niuernermi nalinga nalinginit aalajangersarneqartunit 20 procentimit appasinnerusoq uppersarneqarpat, pisuni imm. 2-8-mi taaneqartuni nalingisa appartinnissaat suliani ataasiakkaani akileraartussaataasup imaluunniit unerartitsisussaataasup piunasaqarneratigut akileraartarnermut ingerlatsiviup akuerisinnaavaa. Ajunngitsorsiassat pineqartut nalingi, nalinginit aalajangersarneqartunit 20 procentimit qaffasinneruppata, pisuni imm. 2-6-mi taaneqartuni nalingi suliani ataasiakkaani akileraartarnermut ingerlatsiviup qaffassinnaavai.”

8. § 19 a kingorna ilanngunneqarpoq:

” **§ 19 b.** Akiliunneqarluni angalanerit § 34, imm. 1, nr. 15-mi taaneqartut eqqaassanngikkaanni, akiliunneqarluni angalanerit nalingi aningaasartuutitut sulisitsisup angalanermit akiligaannut, aalajangersarneqassaaq, taamaattoq takuuk imm. 2 aamma 4.

Imm. 2. Taamaattoq Kalaallit Nunaanni aallarfiup Kalaallit Nunaannut ornigassamut uterlugulu imaluunniit Kalaallit Nunaanni aallarfiup Københavnimut uterlugulu akornanni ataasiarluni akiliunneqarluni angalanerup nalinga, nr. 1-3-mi annertussusiliussanit annertunerusinnaanngilaq. Angalanermit akigitaq Københavnimut angalanerup akianit annertunerunngippat, Københavnimukarnissamut taarsiullugu ornigassaq alla Kalaallit Nunaannut toqqaannartumik timmisartumik attaveqartoq atornerarpat, takuuk imm. 1, akiliunneqarluni angalanerup nalinga aalajangersakkami matumani ilaatinneqartoq aalajangersarneqassaaq:

- 1) Angalanermit ataatsimut 17.680 kr. (2022-mi inissisimaneq).
- 2) Meeqqamut 2-nit 11-nut ukiulimmut ataatsimut angalanermit ataatsimut 8.840 kr. (2022-mi inissisimaneq).
- 3) Meeqqamut 2-t inorlugit ukiulimmut ataatsimut angalanermit ataatsimut 1.760 kr. (2022-mi inissisimaneq).

Imm. 3. Ullut ilai inuussutissarsiornermit siunertanut aammalu ullut allat nammineq inuttut siunertanut atornerartillugit angalanerit nalingi imm. 1-imituulli akileraaruserneqassapput, nalinga ullunik inuussutissarsiornermit siunertanut atornerartunut naleqqiussilluni annikillisinneqassalluni. Taamaattoq angalaneq feeriarnarup, qaangiuttoornerit sulinnigiffeqarfiginerisa, sulinnigiffeqarnerup imaluunniit nammineq inuttut siunertap taamaaqataata sivilissusaa uninngaarnerup 50 procentianit sivilissusimappat imaluunniit ullunit ataqatigiissuni 5-iniit sivilissusimappat, aatsaat angalaneq akileraaruserneqassaaq. Aammattaq nammineq atukkat nalingi minnerpaamik 1.000 koruuniussasoq piunasaqaataavoq.

Imm. 4. Feeriarnissaq siunertaralugu sulisup nalinginnaasumik najugaqarfiata aammalu suliffiugallartussap, imaluunniit aalajangersimasumik suliffiusussap, pineqartup sulinermini uninngaarfigeqqusaanngisaata akornanni angalanerit, angalanermit ataatsimut 2.000 koruuninik akileraaruserneqassaaq. Uniffik siulleq aappaalu malillugit naatsorsuinermit ullut angalaffiusut, arfininngornerit, sapaatit nalliuttulli ilanngunneqassanngillat. ”Ullut nalliuttut” paasineqassaaq tassaasut ukiutoqqap ullua, ukiortaap ullua, kunngit pingasut ulluat, sisamanngorneq illernartoq, tallimanngorneq tannaartoq, påskip ullua, påskip ulluata aappaa,

tussiarfissuaq, qilaliarfik, pinsip ullua, pinsip ulluisa aappaat, Kalaallit Nunaanni inuiattut ullorsiorneq, juullip unnukkuutaava, juullerujussuaq aamma juullip naggataa.

§ 19 c. Ukioq isertitaqarfiusoq 2023 aallarnerfigalugu ilanngullugulu § 19, imm. 2-mi, § 19 a, imm. 2, nr. 1-2-mi, § 19 a, imm. 4-6-imi aamma § 19 b, imm. 2, nr. 1-3-mi naligitat akigititanik naleqqussaannermut procentiliussamik iluarsineqassapput. Nalingi koruunit aningaasartaannut iluitsumut qaninnermut annikillisinneqassapput. Akileraartarnermut ingerlatsiviup ukiup isertitaqarfiusup annertussusiliussat atuuffissaata siuliani kingusinnerpaamik qaammatsiutit malillugit ulloq 10. oktobari ukiumut isertitaqarfiusumut annertussusiliussat atuuttut ukiumoortumik nalunaarutigisassavai.”

9. § 20, imm. 2, imatut oqaasertalerneqarpoq:

”Imm. 2. Akileraaruteqaataasussaannngitsut aningaasartai 5.000 koruuniupput.”

10. § 21, imm. 2, imatut oqaasertalerneqarpoq:

”Imm. 2. Ilanngaat aalajangersimasoq 10.000 koruuniuvoq.”

11. § 36 b, imm. 2-mi immikkoortut pingajuanni uniffittut nutaatut ilanngunneqarpoq:

”Akileraartussaataitaasoq akileraartarnermut ingerlatsiviup piumasaqarneratigut piffissamut killiliussap akileraartarnermut ingerlatsivimmit aalajangersarneqartup, kisianni ullunit 60-init sivikinnerusinnaannngitsup, iluani uppersaat nassitissavaa.”

12. § 36 b, imm. 3, imatut oqaasertalerneqarpoq:

”Akileraartussaataitaasoq imm. 1 malillugu paasissutissanik tunniussisimannngippat, akileraaruserinermik ingerlatsineq pillugu Inatsisartut inatsisaanni § 19, atuutsinneqassaaq.”

13. § 38 c, imm. 1, imatut oqaasertalerneqarpoq:

”Suliffeqarnermut ilanngaammut isertitat tungaviusussat tassaapput isertitat A-t aamma B-t ataatsimut katillugit, aningaasat § 41, imm. 2 aamma § 47 b, imm. 6 malillugit isertitani akileraaruserussani ilanngunneqannngitsut ilassutigalugit.”

14. § 38 d, imm. 1, imatut oqaasertalerneqarpoq:

”Isertitanut tungavissat naatsorsorneqarneranni, tunniussinerit imm. 2, nr. 1-4-mi aalajangersakkami tassani taaneqartut eqqaassanngikkaanni, tunniussinerit soraarnerussutisiaqalernissamut aqqissuussinerit peqataasussaataitaaneq pillugu Inatsisartut inatsisaanni § 2, imm. 2-mi aamma 3-mi taaneqartut ilanngunneqassanngillat.”

15. § 63, imm. 2, imatut oqaasertalerneqarpoq:

” Imm. 2. Kommunini ataatsimoorussamik akileraarut 6 procentiuvoq.”

16. § 67, imm. 1, imatut oqaasertalerneqarpoq:

”Qaammatisiutit malillugit ukioq pineqartoq sioqqullugu ukiup affaani siullermi Inatsisartut ataatsimiinneranni Inatsisartut allatut aalajangiisimangippata, inummut ilanngaatiq annertussusissaa 48.000 koruuninut aalajangersarneqassaaq.”

17. § 73, imm. 1, uniffik siulleg, imatut oqaasertalerneqarpoq:

”Ingerlatseqatigiiffinnut akileraarutit, nunamut tamarmut akileraarutit, kommuninut ataatsimoortumik akileraarut, kommunimut akileraarutit nunamullu tamarmut akileraarutit immikkut ittut kapitalimi matumani maleruagassanut naapertuuttumik akilersinniarneqassapput.”

18. § 75, imm. 1-imi, nr. 4-tut ilanngunneqarpoq:

”4) Ajunngitsorsiassat nalingi § 19, imm. 2-4-mi, §19 a-mi aamma § 19 b-mi pineqartunut ilaatinneqartut, sulitilluni pisuni atugassiisutigineqartut. Taamaaqataani, pineqarput ajunngitsorsiassat uniffik siullermi naaneqartut inunnut siulersuisuni, ataatsimiitaliani, isumalioqatigiissitani, siunnersuisooqatigiinni, aalajangiisartuni imaluunniit allani ataatsimoortuni oqartussani, ilanngullugit Naalakkersuisut, Inatsisartut aamma kommunalbestyrelsit, ilaasortatut imaluunniit ikiortaasussatut toqqagaasunut, kiisalu pissutsit allatigut immikkoortumi tassani pineqartunut ilaatinneqanngippata § 86, imm. 3-imi taaneqartut amerlanerussuteqarluni aktiaatilinni, ingerlatseqatigiiffimmit pineqartup amerlanerussuteqarluni aktiaateqarfigisaanit ajunngitsorsiassanik atugassiivigineqartut.”

19. § 83, imm. 3, imatut oqaasertalerneqarpoq:

” *Imm. 3.* Akileraarut B akilersugassani 12-imi qaammatit aallaqqaatai tamaasa akiligassanngortarpoq, qaammammi akiligassanngorfiani ulloq akiliiffissaq eqqortoq kingulleq 20-ani pisussaalluni. Ulloq akiliiffissaq eqqortoq kingulleq sapaataappat, nalliuttuuppat imaluunniit arfininngorneruppat, piffissamut killiliussaq ulluinnaap tullianut sivitsorneqassaaq.”

20. § 85 kingorna kapitali 7-imi ilanngunneqarpoq:

”*Ingerlatseqatigiiffimmut akileraarutaagallartog*

§ 85 a. Ingerlatseqatigiiffiit peqatigiiffiillu il.il. kingusinnerpaamik ulloq 31. decembari nammineq kajumissutsiminnik ingerlatseqatigiiffimmut akileraarut ukiumi isertitaqarfiusumi naatsorsuutigineqartoq akilersinnaavaat. Ingerlatseqatigiiffiup ukioq isertitaqarfiusoq qaammatisiutit malillugit ukiumit allaanerutippagu (ukioq isertitaqarfiusoq nikisitaq), kingusinnerpaamik ukiup isertitaqarfiusup atorneqartup naannginnerani akileraarutaagallartog akilerneqassaaq. Ulloq akiliiffissaq eqqortoq kingulleq sapaataappat, nalliuttuuppat imaluunniit arfininngorneruppat, piffissamut killiliussaq ulluinnaap tullianut sivitsorneqassaaq. Aningaasat akilerneqartut taagorneqarput akileraaruteqarallarneq.”

21. § 104-imi, imm. 2-tut ikkunneqarpoq:

” *Imm. 2.* Pissutsit imm. 1-imi pineqartunut ilaanngitsut, piaaraluni imaluunniit mianersuaalliorujussuarluni pisussaaffimminik § 3 a malillugu pisussaaffigisaminik naammassinninngitsoq, mianersoqquneqarluni imaluunniit akiliisitaalluni pineqaatissinneqarsinnaavoq. Kalaallit Nunaanni Pinerluttulerinermut inatsimmi maleruagassat malillugit pisussaataasooq pisinnaatitaasorlu akiliisussanngortinneqarsinnaavoq.”

22. § 105, nr. 5-8 imatut oqaasertalerneqarput:

”5) § 46, imm. 2 malillugu akitsuutinik unerartitsinissaminik naammassinninngitsoq,
6) § 46, imm. 1 malillugu akitsuutinik unerartitanik piffissaagallartillugu akiliinngitsoortoq,
7) nakkutigineqartumik nuussinerit pillugit killilimmik uppersaasiisussaataaernermit piunasaqaatit naammassineqarnissaat pillugu eqqunngitsunik paasinerluutaasinnaasunilluunniit nalunaaruteqartoq, takuuk 39 b, imm. 4, imaluunniit
8) akileraartarnermut ingerlatsivimmiit piunaffigineqarluni nakkutigineqartumik nuussineq § 39 b, imm. 2, aamma nunamiit nunamut nalunaarusiaq malillugu suliarineqartussaataasooq, takuuk § 39 b, imm. 6-12 pillugu allaganngorlugu uppersaammik piffissaq eqqorlugu nassiussinngitsoq.”

§ 2

Inatsisartut inatsisaat ulloq 1. januar 2022 atuutilerpoq, taamaattoq takuuk imm. 2-4.

Imm. 2. § 1, nr. 1, 9, 10, 15, 17, 18 aamma 20, 1. januar 2023 atuutilissapput aammalu ukiumut isertitaqarfiusumut 2023-mut atuutissallutik.

Imm. 3. § 1, nr. 13 aamma 14, inatsisip atuutilernerata nalunaarutigineqarnerata aqaguani atuutilissapput aammalu ukiumut isertitaqarfiusumut 2021-mut suliffeqarnermut ilanngaatiip naatsorsorneqarneranut atuutissallutik.

Namminersorlutik Oqartussat ulloq x. xx. 2021

Naalakkersuisut Siulittaasuat